

■ DA LA VITA DA LUDMILLA CAHENZLI

«Survival» en il guaud ed a chasa

L'emna passada è mes ord scola. «Guarda mamma, quai è per tai.» Per il solit reagesch'jau sin trais differentas modas, sch'i vegn cedels dal scolast. A: Jau vom en svaniment. B: Jau ma zup sut il cumpost. C: Jau survegn depressiuns e stos immediat telefonar a mia terapeuta per far giu in termin. L'emna passada è si stà auter. Jau hai reagì a moda suverana, mes uffants schessan «coola».

In'era betg mo in cedel da la scolasta da religiun che leva envidar ad ina saira da geniturs. Na, atgnamain eri in cedel cun pulitas pretenziuns – sco usità – pertutgant ils dus dis da «survival en il guaud». Durant quels dus dis duain ils uffants «racoglier experient-schas fundamentalas» ordaifer la stanza da scola ed emprender «abilitads da survivor en cuntradas selvas».

La raschun principala per Lils dis da «survival» n'era sa chapescha nudada nagliur sin il cedel. Igl è suandanta raschun: Quest'emna è Ascensiuin. In di avant ed in di suenter quest firà han nossas scolars serrà. Ils scolars han liber. Ed ils scolasts pia era. I vegn fatg scola mo il glindesdi ed il mardi. Quels dus dis fan ils scolasts projects per ch'els possian charlar gia il mardi da mezdi e lura svelter seser en l'auto e svelter charrar en l'Italia senza vegnir en colonnas. Scolasts èn clevers.

Ma basta. Per ch'els scolasts na hajan betg memia stregn avant il viadi strapaziu en l'Italia, datti dis da survival per ils scolars. Ed il cedel instruescha

ils geniturs, tge ch'igl è tut da preparar.

«Punct 1: Velo controllà e pumpà, cun chazzola davanti e davos che funcziunan omaduas!» Per cletg ha mes um Eugen gist pinà ils velos avant duas emnas. Chazzolas n'han noss velos betg. Ma ins na sto gea betg adina prender tut uschè serius.

«Punct 2: Buns chalzers da muntogna. Betg novs, mabain gia duvrads, uschiglio datti vaschias!» Tipic scolasts. N'han nagina idea. Danunder duess jau prender la primavaira chalzers da muntogna che mes mat ha gia duvrà, sche ses pes creschan mintga mais ina numra. Jau decid da dar ad el ils veders da mia figlia. Vischias datti soviso.

«Punct 3: Nutriment sanadaivel.» I suonda ina glista cun circa trenta criteris ch'ins sto tegnair en tar las mangiativas ch'ins dat als «survivalists» en il satgados. Jau decid dad ir glindesdis endamaun al tancadi e cumprar las chaussas. Pertge sch'jau cumprel gia il venderdi las mangiativas, svaneschan ellas tuttina sursonda-dumengia ord frestgera. Nun ch'jau tegniss propi en ils criteris da sanadad inditgads sin il cedel.

Sulet cura ch'jau legel «Punct 4» ponderesch'jau in mumentin, sch'jau duess forse tuttina telefonar a mia terapeuta. «Il mardi cumenza il di da survival in zitg pli baud. Nus ans rimnain a las 4.00 tar la chasa da scola. Igl è impurtant ch'els uffants hajan mangià in bun ensolver, perquai che nus faschain ina lunga tura cun il velo. Ils uffants turnan da las 11.00 a chasa. Suenter han els liber.» (Ed ils scolasts van en l'Italia. Da questa

persvasiun na pudess gnanca mia terapeuta ma curar.)

Tut quai munta ch'jau stos levar da las 3.00. U forse gia avant. Pertge fin ch'jau hai dumagnà mes mat-dorma-stagn-e-bain or da letg dov'jau segir ina mes'ura. E fin ch'jau hai motivà el da mangiar dus tschaduns cornflex da quellas uras, vai anc ina giada in quart d'ura. Ma tuttenina hai jau ina idea geniale. Jau na telefonesch betg a la terapeuta, mabain a mes um.

Ti Eugen. Has ti gia in regal per mai per il di da la mamma?» «Jau avev en senn da cumprar fluras.» «Ti pos spargnar ils raps per las fluras. Jau hai ina bler megla idea.» «Tgenina?» «Quest regal per mai pudessas ti gist cumbinar cun ir a luvrar in zitgelin pli baud il mardi proxim.» «Gliez fiss prima. Tge è si pia?» «Ti stuessas levar il mardis da las 3.00 e trametter noss mat a ses di da survival. Ti pudessas lura gist anc controllar, sch'els pneus dal velo èn pumpads ed unscher la chadaina. Quai fas ti gea bler meglier che jau. E l'avantatg fiss, ti fissas ina giada ad uras en biro. Là sas ti gea anc durmir in zitgel. Quai fiss in prima regal per il di da la mamma.» Igl è chapibel che la resposta na vegn betg gist uschè spontan.

Pir cura ch'jau empermett ad Eugen, che quest regal valia lura era gist per ils proxims trais dis da la mamma (Fa total quatter matgs fluras à 35 francs = fa 140 francs.) di Eugen da quai plat: «Sche bun pia.» Quai è «survival» a chasa.